



Artur Robbi in gir cun sieu bus da shuttle a differentas occurrenzas da sport in Engiadina.

FOTO MAD

«Fer qualchosa per la generalited»

Grandas occurrenzas da sport drouvan üna buna organizaziun. Sper il militier e la protecziun civila giouvan voluntaris üna granda rolla tar la realisaziun da quellas. Qualchün chi'd es da la partida scu voluntari daspö ils Champiunedis mundiels da skis dal 2017 es Artur Robbi da San Murezzan. El ho pigliu cun se la FMR sün ün gir in sieu bus da shuttle ed ho quinto davart da sia lavur variada.

MARTIN CAMICHEL/FMR

Artur Robbi füss gnieu pensiuno da l'an 2013 ed ho zieva aucha lavuro inavaunt fin da l'an 2015. El d'eira a la fin da sia carriera professiunela tar la pulizia da fö e d'eira respunsabel per l'Engiadin'Ota e las vals dal süd. Culs Champiunedis mundiels da skis dal 2017 as ho'l la aprüma vouta annunzcho scu voluntari. «La motivaziun d'eira quella da fer qualchosa per la generalited, da pudair güder e fer qualchosa traunter la glieud», disch Artur Robbi.

La lavur al ho plaschieu bain ed el es daspö lo da la partida tar tuot las grandas occurrenzas da sport in Engiadin'Ota.

Flexibilitè e variasiun

Controlla d'ingress, controlla da las portas tar cuorsas e schofför dal bus da shuttle – las lavours cha Artur Robbi ho già pudieu fer d'üraunt sia carriera scu voluntari sun fich variadas. Düraunt il Champiunedis mundiels dals parasportists 2021, cur ch'el ho pigliu cun se la FMR sün ün gir, d'eira Artur Robbi respunsabel pel transport dals voluntaris sü Salatrains, pel transport da la pressa ed eir da VIPs.

Üschè as vaiva eir tschanteda *Mikaela Shiff-rin* cun sieu trainerer düraunt las cuorsas da coppa mundiel da december tar el aint il bus. Artur Robbi disch: «Que es adüna interessant, schä's po discuorrer cun quista glieud. Üschè cunter nu's vain më ad els e tuot in üna vouta tschainta aint qualchün cha's cugnuoscha la

vusch. Que do adüna darcho pitschnas surpraisas il minchadi.»

La mited november 2021 d'eira Artur Robbi sülla Diavolezza a las cuorsas da da coppa europea e respunsabel per la controlla da las portas. Lo as vaiva el eir dischluocha la speda. 16 dis pü tard d'eira el darcho da la partida scu voluntari per las cuorsas da la coppa mundiel a San Murezzan. Artur Robbi disch: «Eau d'he adüna l'ideja sch'èau m'annunzch, alura vulesi gügent trer tres, eir per ils respunsabels chi faun quint cun me.»

Cun mauns e peis

Il contact cun glieud da tuot il muond es traunter oter eir ün motiv per Artur Robbi däs parteciper scu voluntari. Tenor el discuorra la granda part da la glieud inglais, ma minchataunt as vain eir confrunto cun persunas chi nu discuorran insomma na inglais. In quels mumaints s'ho il voluntari eir dad exprimer cun mauns e peis. «Minchataunt d'he in quels cas da fer atenziun cha nu lasch ir la rouda da manascher. Que's clappa ün sentimaint che chi vöglan ed alura provui da der üna resposta. Zieva suni eir cuntaints sch'èau provu d'als güder, eir scha nu's discuoora lur lingua», disch Artur Robbi.

Scu üna famiglia

In viedi giò da Salatrains vaiva Artur Robbi dad ir a piglier üna voluntaria. In discuors cun els haun tuots duos confermo cha la lavur vain fich prescheda, saja que dals organisatuors scu eir dals atlets sves.

Els haun eir quinto, cha sur ils ans sajan adüna darcho ils listess voluntaris da la partida. Els as chattan minchataunt eir da sted per ir a tschainta u per fer qualchos'oter insemel.

«Que's cugnuoscha la glieud e scha nu's vain adüna a bröch cun tschertas persunas, alura as provua dad ir our'd via a quellas. A la fin faimsa que da libra volunted e que do adüna darcho da quels, chi haun l'impreschiun dad esser il chef», disch *Vroni Stoffel*, la vultaria da Samedan chi'd es gnida mned a chesa.

Ils giuvens ed ils indigens maunchan

La granda part dals voluntaris sun pensiuos e da quels vegnan bgers da la Bassa. Tenor ils voluntaris es que cler ch'als giuvens e la glieud chi lavura nu vout sacrifier las pochias vacanzas per ir a lavurer voluntariamaing. «Eir scha que ho qualche giuvens voluntaris ans mauncha üna nouva generaziun. Que es bel cha vaina uschè bgers chi vegnan sün an per an da la Bassa a fer da voluntari. Quel sun alura fich superbis d'esser part da las occurrenzas ed haun l'impreschiun dad esser üna part da l'Engiadina», disch Artur Robbi.

Discurrind sur dals motivs perche cha maunchan giuvens ed indigens voluntaris, nun haun ne Vroni Stoffel, ne Artur Robbi savieu der üna resposta u gieu üna soluziun. Artur Robbi managia: «Üna varianta füss da cumazer a pajer a la glieud. Ma prüma nu's po pajer a tuots our da motivs finanziaels e seguonda nu füss la lavur pü la lissessa. Eau nu'm partecips pü scha gniss pajor», disch Artur Robbi.

«Eir scha que ho qualche giuvens voluntaris ans mauncha üna nouva generaziun. Que es bel cha vaina uschè bgers chi vegnan sün an per an da la Bassa a fer da voluntari.»

Vroni Stoffel, voluntaria da Samedan

ZUOZ/POSCHIAVO


Decisiun dal chantun agita politica cumünela a Poschiamo

Radschun per la melcuntantezza traunter la vschinauncha da Poschiamo es, scu cha la Stüostschweiz scriva, üna piazza chantunela da silvicultur. Quella vess da müder da Poschiamo a Zuoz.

In üna charta aviarta al chantun fo la suprastanza da la vschinauncha uossa l'imbüttamaint cha que saja üna centralisaziun. Mincha singula piazza in üna region periferica saja da munteda decisiva. Da las impromischius da la regenza da vulair promover piazzas da lavur eir illas regions nu's sainta ünguotta. Ils ultims svilups muossan però in ün'otra direcziun, uschè la suprastanza da Poschiamo.

Chantun argumentescha cun reorganizaziun chi gira già daspö löntschn

Il chantun argumentescha sia decisiun traunter oter cun la reorganizaziun chantunela chi'd es già in gir daspö il 2002 e vegn terminada cun quista müdeda. I'l ram da quista reorganizaziun sajan ils anteriurs 30 uffizis forestels cirquitals gnieus unifichos i'ls tschinch centers regionels scu ch'els existan hoz. Radschuns principels per quist pass sun tenor *Urban Maissen*, il mnedr da l'Uffizi per god e prievels da la natüra, pretensiuns pü otas chi pretendan collavuratur e collavuraturas spezialisedas. Perque, ma eir per unificher las lavurs, saja üna collavuraziun pü stretta i'ls centers regionels necessaria. Per la suprastanza da Poschiamo sun quists argumaints però greivs da chapir. (so/rtt/fmr)



I'l ram da quista reorganizaziun sajan ils anteriurs 30 uffizis forestels cirquitals gnieus unifichos i'ls tschinch centers regionels scu ch'els existan hoz.

FOTO SOMEDIA

LITTERATURA

Reediziun da «Mi'orma sa svoler»

Punctualming per las festas es cumparüda üna reediziun da «Mi'orma sa svoler» cun poesias e versiuons poeticas da Jachen Luzzi. Quai scriva la chasa editura «editionmevinapuorger» in üna comunicaziun a las medias.

La reediziun – chürada da *Mevina Puorger* e *Jachen Andry* – as poja cumprar pro la Lia Rumantscha, pro'l Chesin Manella a Schlarigna, pro la libreria poesia Clozza a Scuol o in mincha libreria chi venda cudeschs rumantsch. Ulteriuras infuormaziuns daja suot: www.editionmevinapuorger.ch (cdm/fmr)



Üna reediziun da poesias da Jachen Luzzi.

FOTO EDITION MEVINA PUORGER